

Minggu Saham Digital dapat sambutan luar jangkaan

Permodalan Nasional Bhd (PNB) melakar sejarah tersendiri dalam pelan transformasinya dengan merombak Minggu Saham Amanah Malaysia (MSAM) ke format digital menerusi Minggu Saham Digital (MSD) untuk meningkatkan tahap celik kewangan rakyat di negara ini sejajar dengan perkembangan pesat teknologi dan digital.

Presiden dan Ketua Eksekutif Kumpulan PNB, Ahmad Zulqarnain Onn, berkata walaupun MSD berlangsung di platform digital, program yang diatur menyeluruh bagi membolehkannya mendekati dan berinteraksi de-

ngan segenap lapisan rakyat dalam semua peringkat umur secara serentak di seluruh negara, berbanding penganjuran MSAM secara fizikal yang hanya dikunjungi masyarakat setempat.

Beliau berkata, MSD diatur padat dengan aktiviti interaktif serta hiburan didik untuk membimbing dan meningkatkan kefahaman masyarakat mengenai kepentingan simpanan dan pelaburan.

Katanya, dalam tempoh dua hari MSD berlangsung, sambutan yang diterima amat menggalakkan dan di luar jangkaan.

“Liputan menerusi platform

digital sangat meluas dan kukuh berbanding secara fizikal. Kalau kita buat di bandar, ia mencecah 100,000 hingga 200,000 (pengunjung).

“Namun kini, kami mampu mencapai angka itu dengan mudah, sekali gus menunjukkan kuasa internet dan digital,” katanya kepada *BH* dan *NST* dalam temu bual secara dalam talian, baru-baru ini.

MSD bersiaran setiap hari bermula jam 12.30 tengah hari hingga 10.30 malam dari 18 hingga 24 November 2020 melalui laman Facebook dan saluran YouTube rasmi MSD.

Penonton dapat menyaksikan pelbagai program hiburan didik dengan topik kewangan, pelaburan, keusahawanan dan ekonomi, seperti Cikgu CEO, Makan Dulu, Sembang-Sembang ASNB dan ASB-Iclif MBA Masterclass Series.

Sepanjang minggu, MSD juga mengadakan sesi Khidmat Nasihat 1-1 untuk orang awam dan pemegang unit untuk mengetahui lebih lanjut mengenai pelaburan mereka.

Mengulas pelan hala tuju teknologi maklumat (IT) lima tahun PNB, Ahmad Zulqarnain, berkata pelan itu dilaksanakan

untuk memperkemas dan mempertingkatkan sistem IT supaya operasi dalamannya lebih mantap dan berkesan dan pada masa sama mempermudah interaksi dengan pemegang unit serta masyarakat secara keseluruhan.

Beliau berkata, menuju ke depan, PNB akan melabur lebih RM200 juta sebagai sebahagian pelan hala tuju IT yang dilaksanakannya itu.

Katanya, mandat PNB adalah menjadikan pelaburan sangat mudah bagi Bumiputera dan rakyat Malaysia, yang mana pelaburan boleh dibuat dengan membuka akaun serendah RM10.